

**Pigineqatigiilluni inissiat pillugit Inatsisartut inatsisaata allanngortinnissaa pillugu Inatsisartut inatsisaat**

(Inissiat attartortittakkat allanngortinnerat, kaaviiartitsinissamut inerteqqut il.il.)

(Ineqarnermut Attaveqaasersuutinullu Naalakkersuisoq)

**Saqqummiussissut**

(Ineqarnermut Attaveqaasersuutinullu Naalakkersuisoq)

**Siullermeerineq**

Pigineqatigiilluni inissiat pillugit Inatsisartut inatsisaata allanngortinnissaa pillugu Inatsisartut inatsisaata allanngortinnissaa pillugu Inatsisartut inatsisissaattut siunnersuut, Naalakkersuisut sinnerlugit matumuuna saqqummiuppara.

Ineqarneq pillugu aaqqissuusseqqinnissap atuutsilersinneqarnissaanut siunnersuut ilaavoq, *Ineqarnermullu aningaasalersueriaatsinik nalilersuinermi* innersuussutinik aallaaveqarluni. Naleqqutinngitsorpaaluit nalilersuinermi uparuarneqarput, taakkualu allannguutissatut siunnersuummi matumani aaqqiiviginiarneqarlutik.

Allannguutissatut siunnersuummi immikkoortut pingaernerit tulluuttut ersarissarumavakka:

Aalajangersakkamik ilanngussisoqarpoq, taannalu atorlugu Naalakkersuisut kommunalbestyrelsillu inissiat attartortittakkat pioreersut pigineqatigiilluni inissiatut allanngortinnissaannut piginnaatinneqarput, matumani attartortunit pioreersunit isumaqataasoqarnissaa piumasarinngikkaluarlugu. Siunnersuummi inissiat attartortittakkat pisortanit pigineqartut amerlassusiisa ikilisaaffiginissaat, innuttaasullu amerlanerit inissiamik namminneerlutik pilersulernissaannut anguniagaqarnissaq siunertarineqarpoq. Siunnersuut malillugu pigineqatigiilluni inissiatileqatigiiffiup pilersinneqarnissaa Naalakkersuisut aamma Kommunalbestyrelsip isumagissavaat, taamaalillunilu pigineqatigiilluni inissiamik pisinissaq pillugu innuttaasut ataasiakkaat aalajangiinissaat pisariinnerulersillugu.

Pigineqatigiilluni inissianik inoqanngitsunik tuniniaanerup akuttoqatigiissillugu pisarnissaa anguniarneqartariaqarpoq, matumani inissianut nammineq pigisanut neqeroornerit piumanerillu akornanni sapinngisamik pigiinnarnissaat anguniarlugu. Naalakkersuisut aamma kommunalbestyrelsi aalajangersinnaapput, pigineqatigiilluni inissiat inoqanngitsut neqeroorutiginagit, parlattuanilli inissiat nammineq pigisat pillugit niuerfiup pigineqatigiilluni inissianik pisiaqarsinnaaleqqinnissap tungaanut pigineqatigiilluni inissiat inoqanngitsut attartortissallugit.

Piginneqatigiilluni inissiap najugaqarfigineqarsinnaanerata saniatigut inissiaq siunertanut allanut atorneqaqqusaanngitsoq ersarissarneqarpoq. Piginneqatigiilluni inissiaq siunertanut allanut atorneqaruni, tamanna Inatsisartut inatsisaata atuuffianut aamma pisortat taarsigassarsitsinissaannut tunngavissarititaasumut naapertuutissanngilaq. Illuummi piginneqatigiilluni inissiatileqatigiiffimmut tunniunneqartussaasumi attartortittakkami pioreersumi, inuussutissarsiutitigut pioreersumik atuneq mininneqarpoq. Piginneqatigiilluni inissiatileqatigiiffimmi ilaasortap inissiami inuussutissarsiummik mikinerusumik ingerlatsisinnaanissaa ataatsimeersuartunit akuersissutigineqarsinnaavoq.

Naalackersuisut, kommunalbestyrelsip sanaartortitsisullu namminersortup piginneqatigiilluni inissiami najugaqarnissamut pisussaaffeqanngikkaluarlutik piginneqatigiilluni inissiamut atuinissamut pisinnaatitaaffeqarlutik piginneqatigiilluni inissiatillit peqatigiiffiannut ilaasortanngorsinnaanerata erseqqissaaffigineqarpoq.

Taamatut oqaaseqarlunga Naalackersuisut sinnerlugit oqaluuserisassaq Inatsisartunit suliassanngortippara.